



INAUGURACION SNOWFEST PIRENÈUS VAL D'ARAN. 27 DE NOVEME 2015

ETH CAMPION DE FREE SKI, AYMAR NAVARRO, INAUGURARÀ DEMAN ER SNOWFEST 2015

VIELHA. 26.11.15- Eth campion de freeriding, **Aymar Navarro**, daurirà coma pairin er acte inaugurau dera tresau edicion deth Snowfest Pireneus 2015 ena Val d'Aran. Serà deman diuendres 27 de noveme en Vielha, en un acte a on assistirà representants institucionaus dera Val d'Aran coma **Anna Díaz**, conselhèra de Torisme e Desvolopament Economic d'Aran e eth vicesindic e conselhèr d'Espòrts d'Aran, **Luis Carlos Medina**. En aguesta edicion de Snowfest i serà tanben present **Oriol Balaguer**, un des melhors màstres pastissers d'Espanha, qu'a realizat eth **Bombon Snowfest** entad aguesta edicion 2015.

Er Snowfest 2015 arrincarà aguest diuendres 27 de noveme damb era inauguracion oficiau, presidida per **Aymar Navarro**, pairin dera edicion d'enguan, qui ath costat de personalitats der encastre public e institucionau darà eth trèt de gessuda entara alugada dera illuminacion de Nadau e daurirà era convocatòria d'un flasbmob snowdance entà barar e propiciar era sason de nhèu.

Aymar Navarro se classificuèc entre es 10 melhors freeriders deth mon en **Swatch Freeride World Tour North Face**, un circuit en quau hè concurrència era "flor e nata" deth freeride mondiau. Crubèc notorietat per un vidèu convertit en fenomèn viral, en quau se ve coma ac engolís un laueg, que podèc superar pera sua excellenta evolucion coma esquaire. Entà eth, que se considèra sustot aranés, "ei un orgulh èster eth pairin der **Snowfest d'enguan, d'ua hèsta que celèbre era nhèu, que entà nosati en Aran ei simbèu de prosperitat e alegror**".

Dempús dera inauguracion començarà eth completíssim programa dera edicion d'enguan. Eth dissabte 28 peth maitin s'inaugurarà era **Winter Expo**, un salon de materiau tecnic de nhèu e mòda d'iuèrn que per prumèr an acuelh a petiti

fabricadors des Pirenèus. En aguest madeish recinte, **Oriol Balaguer** presentarà eth **Bombon Snowfest 2015** en ua degustacion publica. Era equipa de dessenh de **SarahWorld**, mèrca joena deth grop **Sara Navarro** cabecièr deth sector de cauçat en Espanha, presentarà ena edicion de Snowfest Pireneus 2015 era colleccion càpsula SarahWorld de sabates e complements d'iuèrn Eco-cold, Eco-chic. Se presentarà tanben en "première" era **Bossa Pirenèus**, dessenhada entara tresau edicion d'aguest hestivau

Era tarde deth dissabte arrincarà damb era projeccion deth vidèu "**Searching the Line**" d'**Aymar Navarro**, entà contunhar damb un espectacle de **patinatge artistic** que recree scènes de **Rey León**, eth concèrt deth grop indie-ròck **Kid Wise** e ua session de musica electronica damb eth **DJ D-Yan**.

E fòrça mès, pr'amor que i aurà tanben desfilades de mòda, eth balh ar estil Bollywood, passades de documentaus restacadi damb era nhèu coma era projeccion eth première d'**Aguestes Montanhes**, ioga, visites guidades per bères ues des mès bères glèises romaniques dera zòna e un long eca d'activitats entà toti es publics. Eth programa culminarà damb eth sortèg de forfaits entara estacion de Baqueira Beret, esquís, e ua plaça entà GORE-TEX Experience Tour, ua expedicion de Freeriding ath costat d'Aymar Navarro, que debanarà enes isles Lofoten era 2016 aurfèrta per Flocs Ski- Center.

Aguestes activitats son possibles gràcies ara collaboracion deth Conselh Generau d'Aran, Torisme Val d'Aran, Baqueira-Beret, es Ajuntaments de Vielha e Mijaran, Bossòst e Naut Aran, era Deputacion de Lhèida o eth Consòrci de Comèrç e Mòda de Catalonha (Generalitat de Catalonha) e fòrça autes entitats e establiments collaborators que s'an somat a ua celebracion dubèrta a toti, ua celebracion dera alegror, era natura e era nhèu.

Snowfest Pirenèus- Benvengut er iuèrn

Snowfest Pirenèus ei un hestivau dera nhèu que neishec eth 2013 e qu'eth 2015 celèbre era sua tresau edicion deth 27 ath 29 de noveme, ena Val d'Aran (Lhèida), entà dar era benvenguda der iuèrn enes Pirenèus. Er eveniment diferèncie dus aspèctes: un Hestivau, damb activitats esportives, ludiques, artistic- culturaus, musicaus e gastronomicas a trauès d'un complèt programa entà toti es publics que rebat era manèra de vida e es activitats de montanha mès destacada des Pirenèus centraus. Ua hèira, damb eth salon d'iuèrn Winter Expo en Palai d'Espòrts de Vielha, a on s'exibiràn prumèras mèrques de nhèu (ròba tecnica e materiau d'espòrt), mòda d'iuèrn, es prepauses d'òci de torisme iuernau e era presentacion des eveniments dera sason de nhèu.